

Rätsch-Clique



1. Mir alte Fidleburger hän
Au das Jahr griegt der Rangg,
Fir z'singe, wenn-er lose wänn,
E glaine Schnitzelbangg.
Courage! s'wird wider besser goh!
Die Rote sin in Gfohr,
Und s'kenne bessri Zyte koh
's näggscht Maiekäferjahr.
's wird guet, wenn d'Fresche styge dien
Und d'Zircher — das isch 'sbescht! —
Trotz ihrem Mul studiere mien,
Wie z'Basel d'Bränd me lescht.

2. Zwor jetz gseht's no bidängglic dry,
Solang im Schwobeland
Der Schwyzer dringgt der spanisch Wy,
Und kauft sich allerhand,
Sufft dytsche Kinder d'Milch ewägg,
Losst sich rasiere duss,
Losst butze abb em Kopf der Drägg
Und frisst im Iberfluss,
Solang me in der neie Gluff
Und bis an Grage voll
Sich z'obe iber d'Gränze bufft
Und bschysst der Schwyzerzoll.

3. Naturschutzbund, was isch dy Zwägg?
De schynsch's vergässe z'ha!
Me nielt am Vorstandsdisch im Drägg
Und speit enander a.
Wie d'Vicher im Naturschutzparg
Fahre-n-im Vorstand dry
Und drybe's — weiss der Gugger! — z'starg,
Der Brun, der Serasy.
's sin Ehrekibel alli zwai,
Ain het me-n-usekeit,
Fir daß nit by där Vicherei
Der ganz Verain verheit.

4. Dä Ma het z'wehle zwische Poscht
Und Bundeshus — 's isch schwär!
Die ainti sorgt em fir sy Koscht,
Und 's ander bringt em Ehr.
Er schwanggt und weiss nit, was er wott;
Hit mecht er Peschtler sy,
Morn Nationalrot — hyscht und hott!
Do schlieg der Deifel dry!
Wärsch blibe du am Fueterdrog,
's gäbt sicher besser us!
Denn ob d'im Rot blybsch, isch e Frog,
Vilicht fliegsch wider drus.

5. Modärni Kunscht, hesch's neetig gha,
Daß me dir Helge holt
Us Franggrych und der zaige ka,
Was ächti Kinschtler gmolt.
Doch 's schynt is fascht e wenig z'spot,
Der Glaube fählt de Lyt.
Wil 's Publikum nit ane goht,
So git's e Defizit.
's isch wurscht, im Willy Barth sy Gligg
Isch gmacht, er griegt sy Lohn,
Es winggt em d'Nochberrepublik
In d'Ehrelegion.

6. Der Cicero im Große Rot,
Der Bummika soll's sy;
Au wenn er ebbis nit verstoht,
So hängt er d'Schnaigge dry.
Er macht die beschte Stammdischwitz
Und zieht der Wieland uff;
Doch däm stygt in sy Kepfli d'Hitz,
Er haut em aini druff.
Das Byspil zieht, es macht's efang'
Au d'Noblesse dāwäg; doch
Der Prysi, d'Passer-Vischewang,
Die mien derfir in's Loch.